

拯荒事略

元 廬陵歐陽元原功著

天災流行雖盛世猶或不免顧上之人所以拯恤之
何如耳蕪湖本南方澤國比鄰數邑竝在水鄉每當
春夏之交陽候不戢田舍漂沒民不得耕遂成饑歲
余忝爲令長多方補救亦旣心力交疲究未能保鴻
鴈而安宅之也因輯拯荒事略一編以告我同爲民
牧者

薄征

周禮大司徒以荒政十有二聚萬民一曰散貨利二曰薄征三曰緩刑四曰弛力五曰舍禁六曰去譏七曰省禮八曰殺哀九曰蕃樂十曰多昏十一曰索鬼神十二曰除盜賊

平糴

魏李悝爲文侯作平糴法必謹視歲上中下熟上熟則上之人糴三而舍一中熟則糴二下熟則糴一使民適足價平則止小饑則發小熟之所藏中饑則發中熟之所藏上饑則發上熟之所藏雖遇饑饉水旱糴不至貴

而民自足國以富强

矯詔發粟

漢武帝時河內失火延燒千餘家上使汲黯往視還報曰家人失火比屋延燒不足憂也臣過河南貧人傷水旱或父子相食臣謹以便宜持節發倉粟以賑臣請歸節伏矯制之罪上賢而釋之

貽書貸糴

張侍郎溥知楚州會歲饑貽書發運使求貸糴不報溥因嘆曰民轉死溝壑尙待報耶乃發上供倉廩所活萬

計因上章待罪降詔獎諭

木實爲酪

王莽時洛陽米石價二千莽分遣大夫謁者教民煮木實爲酪

竹實春米

唐天復甲子歲隴西亢陽民多流散山中竹皆放花結實饑民采之春米而食

請租賑饑

宋漢皇甫嵩遷冀州牧奏請一年租以賑貧饑民

分俸贍貧

東漢黃香爲魏郡太守時被水年饑乃分俸祿及所得賞賜頒贍貧民于是富戶各出義穀助官廩以貸荒民民賴以全

興役惠貧

吳中大饑范文正公縱民競渡太守日出宴於湖上自春至夏居民空巷出遊又召諸佛寺大興土木之役又新廩倉吏舍日役千夫監司劾杭州不恤荒政嬉遊無節公乃條叙所以宴遊興造之故皆欲發有餘之財以

惠貧民也由是兩浙之間惟杭州饑民不流徙

作糜食餓

宋陳文惠公堯佐知壽州遭歲大饑公自出米爲糜以食餓者吏皆爭出米共活數萬人公曰吾豈以是爲私惠耶蓋以令率民不若身先使其樂從也

勸令發粟

唐員半千上元初爲武陟尉歲旱饑勸縣令開倉廩以賑貧餒不從會令赴州半千擅發賑之刺史鄭齊宗大驚因而按之時薛元超爲存撫使謂齊宗曰公有百姓

不能救使惠歸一尉豈不愧也遽令釋之

勸民出粟 請免上供

此二條原抄缺

皆太守事
可查補

出俸錢得穀

宋王待制居白知漢州歲大饑乃出俸錢以率僚吏及羣豪共得穀數萬斛賑饑民全活者甚眾安撫使韓琦薦之

以家資質廩

宋李允則知潭州會歲饑欲發官廩先賑而後奏轉運

使以爲不可允則請以家資質廩乃得發于是民列允則治狀以聞詔書嘉獎又趙抃知趙州吳越大饑公發廩勸民而以家資先之民樂從焉

令增米價

宋趙清獻知越州兩浙旱蝗米價踊貴餓死者十五六諸州皆榜衢路禁人增米價公獨榜衢路令有米者任增價糶之於是諸州米商輻輳詣越米價更賤民無饑死者又盧坦爲宣歙觀察使值旱饑穀價日增或請抑其價坦曰宣歙土狹穀少所仰四方之米若價賤則商

船不來民益困矣已而米斗價至二百商旅輳集民賴以生

特寬鹽禁

宋張忠定公詠知杭州歲饑民冒禁販鹽捕獲者數百人公悉寬其禁官屬執言不可公曰錢塘十萬家餓殍如此若鹽禁益嚴則聚而爲盜患益甚矣俟秋成敢爾當痛以法繩之境內卒賴以無擾

嚴出榜文

宋辛幼安帥湖南賑饑榜文只用八字曰刳禾者斬閉

糴者配

不俟奏請

宋范堯夫知慶州餓殍滿路官無穀以賑恤公欲發常平封椿粟麥濟之州縣皆欲俟奏請得旨而後散公曰人七日不食卽死何可待報諸公但勿憂吾甯獨坐罪

民不知荒

宋吳遵路字安道丹陽人明道末出知通州天下旱蝗公乘民未饑時募富民得金錢數萬貫分遣衙校糴米于蘇秀使物價不增又使民採薪芻官爲收買俟冬大

雪乏薪卽以原價鬻于市其薪直仍糴官米平糶與民官不傷財民且蒙利又慮飛蝗爲患教民廣種蠶豆并結蓬茆以處流移病者給藥願歸者具舟續食送之是歲諸郡多轉死惟通民安堵不知爲凶歲也

民得濟急

宋張忠定公詠在成都府嘗夜夢謁紫府眞君接語未久吏忽報請到西門黃兼濟承事以幅巾道服而趨眞君降階接之禮頗隆盡且揖張公坐承事之下詢顧詳款似有欽嘆之意公翌日卽遣典客詣西門請黃承事

者戒令具常所服衣來比至果如夢中所見公卽以所夢告之問平日有何陰德蒙真君厚遇如此且居某之上座耶兼濟云無他長惟每歲禾麥熟時以錢三萬緡收糴至明年禾麥未熟小民艱食之際糴之價直不增升斗亦無高下在我初無所損而小民得濟所急公曰此承事所以坐某之上也令索公裳令二吏掖之使端坐受四拜黃公後裔繁衍至今在仕路者比比青紫

截畱綱運

宋洪皓爲秀州錄事州大水流移塞路倉府空虛無以

爲賑會浙東綱運常平米四萬過城下皓遣吏鎖津柵請守使截畱守不肯曰此御筆所起也罪死不赦皓曰甯以一身易十萬人命訖畱之亡何廉訪使王孝竭至郡曰平江哀號訴飢者旁午此獨無有何也守具以對孝竭曰違制抵罪請爲君脫之呼吏寫奏皓曰食猶未足公能終意更得二萬石乃可孝竭以聞果如數而將

Blank columns for vertical text.



國家圖書館, NATIONAL CENTRAL LIBRARY, TAIWAN, R.O.C.